



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 465/1 Prot.

Tiranë, më 11.03.2021

V E N D I M

Nr. 43, Datë 11/03/2021

Bazuar në nenin 32/1/a dhe nenin 33 të Ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi mori në shqyrtim ankesën nr. 158, datë 28.12.2020, të paraqitur nga Qendra “Konsumatori Shqiptar” në bashkëpunim me organizatën “Durrës Aktiv” kundër Bashkisë Durrës, në të cilën pretendohet diskriminim për shkak të “vendbanimit¹” të banorëve të zonës së Ish-Kënetës². Në vijim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna³, subjekti ankuesi në mes të tjerash informon se: “Zona e Ish-Kënetës në Bashkinë Durrës është një nga zonat e populluara nga një komunitet i ardhur aty prej shumë vitesh nga zona të ndryshme të Shqipërisë. Banorët janë në bashkëjetesë të plotë me njëri-tjetrin, pa ndjerë dallime apo frymë diskriminuese mbi bazë prejardhje apo përkatësie shoqërore. Kjo situatë çënohet nga investimet e bëra nga Bashkia Durrës në këtë zonë dhe pikërisht tek popullsia që banojnë në rrugën “Gjelbërimi” dhe rrugën “Azem Hajdari”. Në këtë zonë mungojnë investimet bazike si: kanalet e ujërave të zeza, ndriçimi publik dhe gjelbërimi. Gjithashtu banorët shprehen se drejtuesit e institucioneve vendore si dhe nëpunësit publikë përdorin gjuhë diskriminuese ndaj këtyre banorëve, duke i konsideruar si të ardhur apo etiketime të tjera”.

¹ Pretenduar nga subjekti ankues me e-mail-in datë 28.01.2021.

² Me e-mail-in datë 30.12.2020 dhe shkresën nr. 127, datë 19.01.2021, është kërkuar nga subjekti ankues identifikimi i shkakut të diskriminimit dhe informacion plotësues.

³ Referuar formularit të ankesës, datë 28.12.2020 dhe informacionit të dërguar me e-mail, datë 28.01.2021.

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit dhe marrjen e masave nga ana e Bashkisë Durrës për krijimin e kushteve për një jetesë sa më cilësore për banorët e zonës së Ish-Kënetës duke planifikuar investime në kanalizime, ndriçim dhe gjelbërim.

1. Pas analizimit paraprak të ankesës nr. 158, datë 28.12.2020, të Qendrës “Konsumatori Shqiptar” dhe organizatës “Durrës Aktiv” kundër Bashkisë Durrës, u konstatua se nga pikëpamja formale, ajo i plotësonte kërkesat e parashikuara nga neni 33/3 të Ligjit 10221/2010 “Për Mbrojtjen nga Diskriminimi”, të ndryshuar. Në këto kushte, Komisioneri për Mbrojtjen nga Diskriminimi filloi procedurat përkatëse për shqyrtimin e saj.
2. Me shkresën nr. 128, datë 19.01.2021, Komisioneri për Mbrojtjen nga Diskriminimi, ka njoftuar dhe kërkuar informacion nga Bashkia Durrës për ankesën e bërë nga Qendra “Konsumatori Shqiptar”. Në mënyrë të specifikuar është kërkuar:
 - Informacion dhe kopje të dokumentacionit provues për investimet e kryera gjatë 4 viteve të fundit nga ana e Bashkisë Durrës, në zonën e Ish-Kënetës, dhe në lagje të tjera të Bashkisë Durrës, lidhur me sistemimin e kanaleve të ujërave të zeza, ndriçimin publik dhe gjelbërimin.
 - Kopje të projekteve të parashikuara, lidhur me investimet në kanalizime dhe trajtimin e ujërave të zeza, sigurimin e ndriçimit në rrugë dhe për gjelbërimin, për vitet 2021-2023, në zonën e Ish-Kënetës dhe në lagjet e tjera të Bashkisë Durrës.

Referuar dokumentit, Lajmërim marrje poste nr: RR614909296AA, datë 20.01.2021 rezulton se shkresa sipërcituar është marrë në dorëzim nga Bashkia Durrës, e cila ka marrë dijeni për shkresën e mësipërme, në kushtet kur dokumenti është nënshkruar nga punonjësja e këtij Institucioni, ashtu dhe nga nëpunësi i shërbimit postar.

3. Në mungesë të përgjigjes së Bashkisë Durrës, nëpërmjet shkresës me nr. 359, datë 23.02.2021, Komisioneri i është drejtuar sërish, përmes një shkrese kujtese për dërgimin e informacionit, duke e njoftuar përsëri që brenda datës 01.03.2021 të paraqesë parashtrimet mbi çështjen në fjalë.

Referuar dokumentit, Lajmërim marrje poste nr: RR618935067AA, datë 24.02.2021 rezulton se shkresa sipërcituar është marrë në dorëzim nga Bashkia Durrës, e cila ka marrë dijeni për shkresën e mësipërme, në kushtet kur dokumenti është nënshkruar nga punonjësja e këtij Institucioni, ashtu dhe nga nëpunësi i shërbimit postar.

Në vijim, Bashkia Durrës, pavarësisht faktit që ka marrë informacion lidhur me shkresat e sipërcituara, nuk ka depozituar asnjë dokument apo parashtrim lidhur me sa ka kërkuar Komisioneri në kuadër të shqyrtimit të ankesës në fjalë.

II. Pas kryerjes së hapave të mësipërm proceduralë, Komisioneri çmon se:

Nga ana e Komisionerit për Mbrojtjen nga Diskriminimi janë marrë të gjitha masat që subjekti kundër të cilit është bërë ankesa të vihet në dijeni për ankesën e bërë dhe i janë ofruar mundësitë që të jepte shpjegime dhe dokumentacion për ankesën sipërcituar, në mënyrë që Komisioneri për Mbrojtjen nga Diskriminimi të kishte mundësi të shqyrtonte këtë ankesë, me qëllim marrjen e një vendimi të drejtë dhe të argumentuar në ligj, për konstatimin ose jo të diskriminimit. Komisioneri konstaton se Bashkia Durrës me dijeninë e plotë nuk ka ofruar bashkëpunim dhe nuk ka dhënë informacionin dhe dokumentet e kërkuara nga Komisioneri për Mbrojtjen nga Diskriminimi.

Komisioneri për Mbrojtjen nga Diskriminimi në pamundësi të një informacioni të detajuar dhe verifikimit të dokumentacionit të kërkuar, është vënë në situatën e pamundësisë për të arritur në konkluzionin mbi trajtimin e pafavorshëm të banorëve të zonës së Ish-Kënetës.

Ligji 10221/2010 “Për Mbrojtjen nga Diskriminimi”, i ndryshuar, në nenin 32/2, të tij ka përcaktuar qartë këtë detyrim, duke cituar se: *“Të gjitha institucionet publike dhe subjektet private janë të detyruara të mbështesin Komisionerin, duke i dhënë informacionin që i nevojitet dhe duke i garantuar aksesin në informacion në përmbushjen e detyrave të tij”*.

Neni 33/13, i ligjit të sipërcituar, ka përcaktuar se: *“Çdo person që shkel dispozitat e këtij ligji dënohet me gjobë si më poshtë”*: b) personi juridik nga 60.000 deri në 600.000 lekë.

Për sa më sipër, Komisioneri për Mbrojtjen nga Diskriminimi arrin në konkluzionin se, Bashkia Durrës, është në shkelje të parashikimeve të bëra në nenin 32/2 dhe në neni 33/13, të Ligjit 10221/2010 “Për Mbrojtjen nga Diskriminimi”, të ndryshuar, pasi nuk ka vënë në dispozicion të Komisionerit, informacionin e kërkuar.

PËR KËTO ARSYE:

Mbështetur në nenet 1, 2, 3/1, nenin 7/1, nenin 21/1, nenin 32/1, gërma a), c) dhe ç) e pika 2, nenin 33/13 dhe nenin 33/1 të Ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar,

Komisioneri për Mbrojtjen nga Diskriminimi,

V E N D O S I :

1. Bashkia Durrës, të gjobitet në vlerën 200.000 (dyqind mijë) lekë, për mosdhënien e informacionit të kërkuar zyrtarisht nga Komisioneri për Mbrojtjen nga Diskriminimi.

2. Gjoha të derdhet në Buxhetin e Shtetit brenda 45 ditëve nga marrja dijani, mbi masën administrative. Pagesa e kësaj vlere të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi: 1091001, Entiteti i Qeverisjes: 001, Distrikti (TDO) 3535, Llogaria ekonomike: 7115499.
3. Dërgimi i informacionit të kërkuar nga Komisioneri, brenda shtatë ditëve nga marrja dijani e Vendimit për sanksionin me gjobë, sjell shfuqizimin e tij.
4. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONER

Robert GAJDA